

Lelong 18467
H. 2368

ADVERTISSE

MENT SVR L'INTEN-
TION ET BVT DE MES-
sieurs de Guise, en la pri-
se des armes.

1585

M. D. LXXXV.

Case

F

39

.326

1585 Lye

THE NEWBERRY
LIBRARY



A M A I S aux mauuais subiects ne man-
qua pretexte de s'armer cõtre leurs Prin-
ces, & iamais aussi aux Princes ne man-
querent les moyens d'auoir la raison de
tels subiets. Dieu qui fait les Rois, Dieu
qui les a ordonnez dessus les peuples,
prend leur cause en main, & se tiét blessé en leurs person-
nes. Dieu qui voit les cœurs, cognoist les couleurs & les
pretextes, les sçait distinguer, les sçait demesler d'entre
les causes. Rien plus ne l'esmeut que l'abus de son nom
allegué en vain, ou à faux tiltre, rien plus il ne vége que
l'hypocrisie, la desloyauté & la confusion, desguisees en
foy, en religion, & en iustice.

Auiourd'huy, que tous ces remuemens se voyent en
ce Royaume, c'est à tous François de tenir les yeux ou-
uerts pour n'estre menez à mal, sous quelque couleur,
sous quelque apparence. que ce soit. Pensons au passé,
comparons y le present, nous verrons d'où ils procedēt,
preuoirons à quoy ils tendent, & iugerons aisement ce
qu'il nous en faut attendre à l'auenir.

C'est vne chose toute cognue & cõmune en ce royau-
me, que ceux de la maison de Guise se dient descenduz
de la race de Charlemagne, & pretèdent, comme à tels
ce royaume leur appartenir. Les Genealogies qu'ils ont,
y a quelque temps falsifiees, les memoires qu'ils en ont
semé de main en main & plusieurs semblables pratiques
nous en pourroiet faire foy: Mais particulieremēt pour
ne reprendre les choses de plus hault, le volume qu'ils
feirent imprimer à Paris il y a quatre ou cinq ans, com-
posé par vn de Rozieres Archidiacre de Thoul, auquel
par passages faux & supposez, & tirez outre & contre
leur sens, ledit de Rozieres tasche de prouuer que ceux

de ceste maison sent descenduz de Pharamond, & de ligne en ligne cōtinuez iusques à cux: c'est à dire, que ceste couronne leur appartenoit deuant que Capet, Charles & Merouee, & leurs races fussent iamais appellez à la couronne. Ce liure fut lors public à Paris & par toute la France, & estât venu à la cōgnoissance du Roy, pour faire le proces à l'auteur fut commis & enuoyé à Thoul monsieur Brulard, à present President aux Enquestes, lequel le luy fit & parfit: mais par la benignité du Roy il obtint grace, fauf à faire améde honorable de sa faute, se recognoistre criminel de leze maiesté, & reuocquer par contraire escrit le liure qu'il auoit fait.

Or ont tresbien cogneu de tout temps ceux de ceste maison que tandis que ce royaume demeuroit paisible, il seroit malaisé de paruenir à leurs intentions: & pourtant ont tousiours tasché de le mettre & entretenir en troubles. Tandis qu'ils ont peu gagner ce point, quelque misere que la guerre ait peu apporter au pauvre peuple, quelque confusion qu'elle ait peu introduire en cest estat, iamais ne s'en sont en rien esineuz, iamais n'ont donné aucune marque de le resentir. Et la raison estoit que le sang de France s'espandoit par ce moyé, & ils vouloient faire leur profit de sa foiblesse, qu'ils estoiet alors les instrumens principaux des miseres du peuple, & plus grandes elles pouuoient estre plus auroient ils de pre-
 texte de les prendre vn iour pour subiect de leurs esmotions, qu'ils auoient les armes & l'authorité en main, pour gagner creance entre les hommes: & par ce moyé icettoient peu à peu les fondemens de leur grandeur pretēdue sur noz iuyes, & que la guerre petit à petit alloit corrompant les cœurs des hommes pour estre, de là en auant, plus capables de tous partiz, & de tous remue-

mens quand le temps leur sembleroit estre à propos.

La religion leur seruoit de subiect à entretenir ces miserables ciuiles, & ne s'apperceuoit on du premier coup que ils abusoient sous ce beau tiltre de la deuotion de noz Princes, & du zele de nostre nation, à leurs desseins, & que ce fut vn pretexte & non vne vraye cause : qui aura bié cognu le feu Cardinal de Lorraine oncle de ceux cy n'é doutera point. Car pé dât qu'il mettoit le feu aux quatre coins de ce royaume en l'ardeur de ce zele prétendu de religio, il declaroit aux Princes d'Allemagne qu'il estoit de leur cōfessiō, & qu'il la vouloit introduire en Frâce, faisoit instituer ses neueuz en la confession d'Ausbourg pour les gratifier, & ne faignoit entre ses familiers de dire que si ceux de la religion pret.ref. n'eussent comme pris à partie ceux de sa maison, il y auoit bon moyé de s'accorder & accommoder ensemble en ce qui estoit de la religion.

En fin fut recognu par la prudence de noz Rois apres auoir tenté toutes extremitez que la religion ne vouloit estre preschée par armes. Que la force pouuoit bien engendrer des hypocrites : mais non de Chrestiens. Que les guerres meres de corruption, au lieu de chasser la religion contraire, introduisoient l'athéisme, mais particulièrement, que ces gens qui conseilloyent tant la guerre pour la religion, n'estoient plus religieux que les autres : que c'estoient de fins barbiers, qui vouloyent entretenir la playe pour leur profit, & qu'il y auoit d'áger qu'à la longue ils ne verifiasent la prophetie du grand Roy François en ces mots : Que ceux de la maison de Guise mettroient ses enfans en pourpoint, & son pauvre peuple en chemise. Et de faict fut par aucuns zelateurs Catholiques remarqué, qu'à la saint Barthelem,

apres auoir induit le feu Roy Charles à se desfaire de ceux de la religion, ils se contenterent de se depeſcher ſous ceſt ombre des pretendus ennemis particuliers de leur maiſon, & venger leurs querelles propres, & feirent les doux & les pitoyables en tous les lieux de leur authorité, faiſant profit par ce moyen en toutes ſortes de la rigueur & ſeucriété de ce prince, qui ſelon la vigueur de ſon eſprit ſ'en ſceut tresbien apperceuoir.

On ſçait auſſi que le Roy à preſent regnant auoit employé ſes ieunes ans avec tous les heureux ſuccez qu'il ſe pouuoit à l'extermination de ceux de la religion contraire, & depuis venant à la couronne continua vn tēps toutes les rigueurs precedentes, tant qu'il recognut que les conſciences ne ſe domptoient ny appaiſoient par la force des armes, & que pour exterminer vne partie de ſon peuple, il ruinoit ſon Royaume & ſon peuplé tout entier. Il ſe reſolut donc à l'exemple de pluſieurs grands princes & eſtats voifins qu'il auoit veuz de compoſer les troubles de ſon royaume par vne bōne paix, laiſſant vn chacun viure ſelon ſa conſcience en attendant que par vn bon cōcile il y peult eſtre mis quelque ordre. Ce pendant ſe delibera de trauailler à remettre les eccleſiaſtiques en leur ancien deuoir, pouruoir aux dignitez de l'Eglife de perſōnes capables & ſoigneuſes de leurs charges, entant qu'il pouuoit. Et ſçachant cōbien peut l'exēple d'vn Prince en toutes choſes, de ſe former luy meſme pour exēple de deuotion à ſa cour, à ſes princes & à ſa nobleſſe : eſtimant que c'eſtoient les vrais, & legitimes moyens ordonnez de Dieu & pratiquez des plus ſages princes pour la reunion de l'Eglife & reduction des conſciences.

Mais à peine eut il fait la paix qui fut ſur la fin de l'an

1577. & fait paroistre quelque desir de l'entretenir de là en auant, sans plus employer inutilement ses armes contre les armes de ses subiects, que ses gens se voyans par la les moyens retrâchez de s'authoriser dedâs les armes, penserent à nouueaux desseings, & firent euidentement cognoistre, que la guerre ciuile leur estoit vtile: c'est à dire que nostre ruine leur estoit edification. Et pour ce la religion leur venant à faillir, aduiserent de troubler l'estat sous vn autre pretexte.

Alors donc ils font solliciter diuerses prouinces de ce royaume à rebellion par leurs partizâs, leur remonstrât les foulles du Clergé, & ne leur disent pas, que les guerres qu'ils auoient allumées & fomentées en estoient cause. Et que le feu Cardinal de Lorraine leur oncle, auoit esté celuy qui premier auoit proposé & procuré la creüe des décimes & la vente de partie du temporel, dont il auoit remporté à Rome mesmes le tiltre de fleau de l'Eglise Gallicane. Alleguent la diminution, & auilissement de la noblesse, & ne leur disent pas, que ceux de leur maison tant qu'ils auoient peu estre en autorité auoient rauallé, entant qu'ils auoient peu, les princes mesmes du sang, qui ne desdaignēt pas d'estre dits les premiers de la noblesse: que la diminution de la noblesse en deuoit estre imputée aux auteurs des guerres ciuiles, comme aussi l'auilissement des charges & dignitez à elle affectées, d'autant que qui introduit la guerre ciuile en vn estat, introduit par la mesme porte la confusion en tous estats, qu'il n'est pas possible apres de repurger & ramener tout en vn coup, mettoyent en auant aussi les creuës des tailles, les inuentions des nouueaux subsides, & imposts sur le pauvre peuple, & n'adioustoiet pas, que la guerre engédre tousiours au Prince nouuelles charges,

& par consequent au peuple, que le moyen vniue de l'alleger estoit laisser continuer la paix. Qu: le peuple ne se pouuoit encor resentir de la benignité de son Prince, par ce qu'il ne faisoit que sortir de la guerre, que rentrer en nouveau trouble, pour auoir soulagement du Prince, estoit vn remede pire que le mal, & mesmes contraire estoit dis-ie retrancher au Prince le moyen de descharger son peuple: & ce qui est le principal, que dix ans d'imposts, ne coustent pas tât au peuple, qu'un seul an de guerre, que dix ans de guerre bien ordonnee ne luy font tant de dommage qu'un an de sedition ciuile telle qu'ils vouloient susciter soubs ce pretexte.

Lors en leurs memoires ils ne parloient point de la Religion. Ce zele dont ils faisoient bouclier deuant & dont ils l'ont fait depuis ne venoit point en auant. Au contraire, ils traittoient avec ceux de la Religion contraire, comme chacun scait pour les faire entrer en ce party. Ils les assureoient de leur exercice selon les edits, & outre les edits, si besoin leur estoit. Ils negotioient en Allemagne nommeement avec le Duc Casimir, tant pour entrer en ceste association, que pour y induire ceux de la Religion contraire, & estre enuers eux garad de leur foy & promesse qu'ils leur donnoient de ne faire rien à leur preiudice, mesmes lay offroient des villes en leurs gouuernemens pour contreplege de la foy, qu'ils interposioient en leur nom, & les choses fussent peut estre, deslors passees plus auant si ceux de ladite religion y eussent voulu entendre.

Le Roy aussi par sa prudence sceut bien diuertir & destourner ce coup, il vit ou le mal leur tenoit, & ne voulant permettre que leurs mescontentemens parti-

culiers missent son peuple en peine se soubsmist iusques
 la, que de tascher à les contenter : Il les appella donq^s
 pres de soy, leur fit de l'honneur, leur donna occasion
 de bien esperer de luy, mesmes leur fit des dons, & leur
 ordonna des assignations de ce qui leur estoit deu, les-
 quelles ils prirent & demâderent sur quelques edits de
 nouvelles impositions, qui furent lors mis en auant.
 Tellement que les mesmes vents qui auoient assemblé
 la nuee la dissipèrent, il leur fut aisé d'oublier le cler-
 gé, la noblesse & le peuple, & quand les deputez des
 prouinces, qu'ils auoient voulu soubz leuer vindrent en
 court à peine firent ils semblant de les voir ou recon-
 gnoistre, mesmes ils assisterent la resolution & emolo-
 gation de plusieurs edits, que le roy à depuis esteints
 & aboliz sur les remonstrances qui luy ont esté faictes
 de la charge qu'ils apportoit à son peuple, & iamais
 ne leur commit de dire vn seul mot au Roy ou priuée-
 ment ou en son conseil pour le soulagement, de ses sub-
 iers. Et de la aduint aussi que les plus sages remarquerēt
 esdites prouinces qu'ils n'estoiēt pas propremēt marris
 du mauuais gouuernement, s'il y en auoit, mais bien
 de n'y auoir telle part qu'ils pensoient leur appartenir,
 plus prests sans doute d'en abuser quand ils l'auroient
 que ceux contre lesquels ils pretendoient former les
 plainctes soubz le nom du peuple,

Ce qui leur a principalement rongé le cœur depuis,
 c'est qu'ils ont veu la paix cōtinuer, c'est qu'ils ont veu
 le Roy resolu de l'establir de pl^s en pl^s, & par le moyen
 d'icelle reformer les abuz qui se seroiēt coulez es char-
 ges de l'Eglise, de remettre la noblesse en sa premiere
 splendeur, & soulager son pauvre peuple des imposts
 & subuentions qui le ruinent, maux introduits pour la

8
pluspart par la continuation des guerres, maux incurables par consequent, que par la continuation de la paix.

Or Dieu ayant retiré de ce monde, Monseigneur frere du Roy ils penserent que la saison estoit venue qu'ils deuoient penser à l'effect de leurs anciens desseings & pour ce commencerent aussi tost à renouveler leurs praticques tant dedans que dehors le Royaume avec les voisins plus suspects & plus dangereux à ce ste couronne, concluans ensemble qu'il leur estoit necessaire d'estre armez à quelque pris que ce fust pour faciliter la mutatiō qu'ils pretendoient faire en cest estat. Et c'est la cause pour laquelle maintenant nous les voions se ietter en campagne, quelque beau pretexte qu'ils aient voulu prendre pour enuclopper gés de toutes qualitez en mesme crime, que certes il n'est naturel ny raisonnable de croire auoir mesme but & intention qu'il ont.

Veut en voir vne marque, qu'ils ne scauent bonnement dequoy couvrir leur entreprinse sur cest estat, ils ont fait des protestations à l'entree de leurs armes, desquelles la seule diuersité peut descouurer la faulseté à vn chacun, en vnes ils iurent l'extirpation de la Religion contraire, és autres n'en sonnēt mot: si le zeile les esmeut comment ce zeile s'est il peu oublier en cest endroit? en vnes ils veulent que le Roy nomme vn successeur en son estat, en autres ils laissent cest article en arriere: S'ils ont tant de soing de l'Eglise Catholique, s'ils craignent tant qu'il n'en mesfauienne apres la mort du Roy, comment leur est elle demourée au bout de la plume? es vnes ils se rendent protecteurs de l'Eglise, & du peuple, & autres pretextes. Qui ne veoit en ces diuersitez, qu'ils ne scauent sur quel pied se mettre? en l'incertitude de ces protestations, vne incertitude de cōscience? vn langage

en somme de gens qui ne sçauēt de quoy parer leur mau-
uaise intétion, qui pensent courir vne faulseré de deux
& deux de trois, & toutes ensemble ne valent qu'à les
dementir, ne seruent qu'à les découirir tels qu'ils sont.

Ils veulent qu'il n'y ait qu'une religion en France, &
c'est le souhait cōmun de tous gens de bien, & de tous
Chrestiens, mais quelles voyes proposent ils pour y
paruenir? s'il est question de force ce grand Empereur
Charles le Quint en Allemagne en a recognu & la debi-
lité & l'inutilité au faict des consciences. Le Roy d'Es-
pagne quelque catholique qu'il vueille sembler, apres
auoir rendus ses subiets de Hollande & Zelande à tou-
tes extremitez par les succez de ses armes fut contraint
l'an soixante seize leur accorder la paix & par la paix
leur laisser leur religion entiere, sans mesmes remettre
la catholique & Romaine esdits pays, ny les ecclesiasti-
ques en leurs biens: & mesmes il y a deux ans leur of-
froit derechef pareilles cōditiōs par le duc de Terra-
ua, & non seulemēt pour lesdits pays: mais pour quelqs
autres. Noz Roys plus que tous ceux la, ont bruslé, ont
noyé, ont vaincu en plusieurs batailles, ont surpris en
plusieurs manieres, ont tenté toutes voyes l'espace de
cinquante ans, n'ont espargné aucuns moyens, pour ve-
nir à bout de ceux de ceste religion en ce royaume. Ce
qui a esté Chrestien à Charles le Quint, ce qui a esté ca-
tholique au Roy d'Espagne, à l'yn pour sauuer des sub-
iets plustost escheuz par electiō que naturels, à l'autre
pour garder des pays qui ne luy sont rien, au regard de
tant de grands qu'il tient, pourquoy le sera-il moins au
Roy pour espargner ceux que nature a mis en sa prote-
ctiō? pour garātir de ruine ineuitable son estat entier?
son estat iadis si florissant, son estat par la resolution

qu'ils veulent remettre sus, reduit en l'extremité en la quelle nous l'auôs veu? s'ils diēt que les guerres n'ont esté bien conduites, à qui s'en pourrōt-ils prendre qu'à eux mesmes? & leurs peres & eux y ont ils pas cōmandé pour la pl^e part? ont ils pas esté arbitres, & de la paix & de la guerre? ont ils pas sonné selon qu'il leur est venu à propos, & selon l'humeur ou ils estoient, tantost la charge & tantost la retraicte?, que s'ils veulent obliger icy le Roy par serment à vne guerre immortelle, c'est à dire ce pauvre estat, & ce pauvre peuple, qui patist depuis tant d'années, à vne ruine finale, à vne misere perpetuelle. Certes c'est vne loy trop insupportable du subiect sur le Prince, certes c'est vn indice manifeste qu'ils ont grand deuotion à nostre ruine de nous y vouloir assister. Disons plus, certes c'est vn argument tout certain, que ses gens veulent estre armez, qu'ils ne veulent point se desarmer, qu'ils veulent enterrer le Roy, ou entre leurs armes, ou s'ils peuvent par leurs armes. Et miserables nous qui aurions à viure sous ceste insolence, miserables qui aurions à suruiure, si leurs desseings auoient lieu, nostre Prince & le sang de nostre Prince, nostre desolce patrie, & les loix de nostre estat

Mais seroit-ce pas pitié de voir apres la mort du Roy ce royaume entre les mains d'vn hereticque? Bons tuteurs, & voyons l'ordre qu'ils y mettent. Nostre Roy est ieune, & graces à Dieu se porte biē, ils veullent qu'il nomme vn successeur, aincois ils le nomment: car ils arment monseigneur le Cardinal de Bourbon, bon prince qui n'apperçoit pas le ieu qu'ils iouent, & luy font prendre la qualité de premier prince du sang, & presomptif heritier de la couronne. Quelle chimere, ou

plustost quelle grotesque est-cecy? fil y va de tant, & fil y a tât à craïdre pour l'eglise Catholique, à qui plustost s'en deussent ils adresser, qu'à nostre Roy, Prince treschrestien? Prince tresdeuotieux? Prince s'il en est au monde zelateur de sa religion? à qui moins penser, fils le font à bon escient, qu'à mouseigneur le Cardinal de Bourbon, prince ia caduc, ia pres de la fosse? & que diray encor? prince qu'ils ne peuuent esperer pou uoir naturellemēt suruiure le Roy, fils n'ôt limité le terme de sa vie? fils n'ôt cōplotté, & fils n'ont capitulé ia mort? Gens qui toute leur vie se sont iouez de la religion monstrent à nostre Roy le chemin de consciēce: les Lorrains enseigneront aux François le zele de leur patrie. Princes estrangers interpreteront noz loix, regleront nōz differens, voudront estre arbitres, voudrōt estre iuges des princes du sang, des degrez de nostre sang? Qui ne voit icy (Dieu ouure les yeux à Monseigneur le Cardinal) qu'ils pensent l'auoir loué, l'auoir emprunté pour iouer le Roy sur l'eschafaut, pent estre six mois, tant que leur partie soit bien dressée? & qui ne voit qu'ils ne pēsent pas à luy, quand ils parlēt de luy: mais à eux mesme? quād ils nōment au Roy aagé de 33. ans vn successeur plus que sexagenaire? Quand ils veulent supplier le deffaut d'hoirs qu'ils alleguent contre nostre Roy par la vigeur de Mōseigneur le Cardinal, qui a ia passé son an Climacteriq? mais pour faire nōmer vn successeur au Roy, prendre les armes & luy vouloir mettre le pied sur la gorge, se saisir de ses places & abuser de l'authorité qu'ils ont de luy, cōtre luy. Qui plus, receuoir & distribuer deniers du Roy d'Espaigne, appeler & introduire les forces d'Espaigne en ce royaume. Certes me pardonne mōseig. le Cardinal si ie le dy, fil

ne veoit encor, c'est ne veoir goutte: car ce n'est certes
 pl^o estre François c'est auoir vëdu ce Royaume au Roy
 d'Espaigne, & auoir ietté le sort sur nostre robbe: laquel
 le säs doubté se sentäs trop foibles pour pouuoir auoir
 tout seulils en veulët faire part à l'Espag. no^o vëdët à luy
 & sous ombre de liberté nous exposent au pillage.
 Iugeons ceste cõspiration, si elle peut proceder d'ail-
 leurs que de l'Espaigne on sçait que mōsieur de Guyse
 est endebté iusques au bout & cependant a distribué
 de grandes sommes & toutes en pistolets par ce Royau-
 me il en a mesmes enuoyé à qui n'en demandoit point
 dou peuent estre venuz ces grands deniers, veu le
 coing qu'ils portent & d'oü donq' estre meuz ses des-
 seings, que du conseil d'Espaigne: Il est assisté des for-
 ces du prince de Parme qui luy amene des Lansequie-
 nets, & quelques compagnies de caualerie (Dieu y a
 remedié depuis, mais cõtre leur espoir) qui est le prin-
 ce de Parme, sinon le chef & directeur es pays de deça
 de tous les desseings d'Espaigne? Il a enuoyé ses en-
 fans delà les monts & le Duc de Sauoye à freschement
 espousé vne fille d'Espaigne, à quelle fin, sinon pour les
 tenir en hostages des sommes qu'il à receues? & pour
 les auoir pour gaiges des promesses qu'il à faictes? Il a
 demandé aussi que la ville de Cambray fust remise cõ-
 me auant qu'elle eüst receu feu Monseigneur: Cam-
 bray ville imperiale, mais opprimee violemment par
 le Roy d'Espaigne: Cambray le seul reste des si chers
 & si precieux labeurs d'un fils de France. Cambray au
 surplus le rempart de Francé, du costé plus desarmé,
 cõtre les efforts d'Espaigne, qui peut ignorer: qui peut
 plus doubter cecy, que sous ces habits François ne lo-
 gent des cœurs d'Espaigne: adioustez les cõmunicatiõs

secretes de monsieur de Guyse & du prince de Parme, les intrinseques conferences avec les Ambassadeurs d'Espagne, les allees & venues de dom Giouan Bardacim vers l'Euesque de Comminges bastard del'Anfac & infinies praticques de ceste nature & qui doubtera que l'armee de ces cōiurateurs ne soit au seruice d'Espagne? qui doubtera donq' que bien tost on ne voie esclater les esquadrons & ploier les enseignes, quand ce qu'il y a de genereux, quand ce qu'il y a de François entr'eux, les vns pouffez d'vn despit, les autres attirez sous vn faux titre se resouuiendront d'estre François, se proposeront, quel monstre seroit vn François armé contre la France: & contre la France pour l'Espagne?

Mais ils ne veulent point tomber sous vn prince heretique. Et la dessus adioustent, que les François ne font point serment au Roy, qu'a cōdition de maintenir l'Eglise Catholique, apostolique, & Romaine, d'agereuse proposition, & qui ne sent rien moins que la deposition de Chilperic pour mettre Pepin en sa place, sous ombre de n'auoir bien defendu l'Eglise contre les Sarrazins. Mais Dieu fera la grace à nostre Roy de defendre bien & longuement sa place. Quoy donc? sil vient à mourir, disons mieux, sils le font mourir, comme ils esperent, ils veulent dire, qu'ils n'endurerōt iamais, que le Roy de Nauarre qu'ils tiennent pour heretique vienne à la succession de cest estat qu'en leur cōsciēce, quelque palliation qu'on y puisse apporter, ils congnoissent bien luy appartenir de droit. Le Roy de Nauarre à assez de iugement pour s'apperceuoir, quand le naturel n'y seroit point, combien en ce tēps, la vie du Roy luy est vile & necessaire, & cest à luy, toutesfois sur ce poit à se defendre. Le Roy de Nauarre leur pourra respoñdre

la dessus, qu'il est né, & nourry en la religion de laquelle il fait profession, qu'en conscience il ne s'en peut de partir sans estre instruit, qu'il est prest & sera tousiours de receuoir instruction d'un concile libre & legitime, & de laisser l'erreur quand il luy sera monstré s'ils demandent que sans autre instruction pour l'esperoir ou le desesperoir d'une couronne, il passe tout à coup d'une profession à l'autre, que requierent ils de luy, qu'inconstance, qu'infidelité qu'hypocrisie? non pour le rendre capable d'estre Roy, ains indigne plustost de l'estre? S'il se presente à estre mieux enseigné & s'il est prest, d'acquiescer quand il l'aura esté, où trouueront ils es anciens canons que ceste obeyssance, ceste summission soit appelée heresie? tout erreur disent les canons, n'est pas pourtant heresie, heresie est un erreur important, un erreur ou il va du fondement de la foy, des articles, du salut. Or le Roy de Nauarre leur dira qu'il est Chrestien, qu'il croit son salut estre en un seul Iesus Christ qui tient & reuere sa parole comme la regle infallible de verité, qu'il croit les symboles de l'Eglise, qu'il reçoit les conciles vniuersels qui ont esté tenus en la fleur d'icelle, qu'il condéne toutes les heresies condénées par iceux, qu'il se soubmet encor auourd'huy à un concile vniuersel deurement conuoqué & legitimement tenu, il n'y a donc point d'heresie, à proprement parler. Car il croit dès cet heure ce que les premiers se sont cõtéz de croire: il n'y a point aussi de schisme, car le schisme presuppose une resolution en separation. Or tenez un bon concile, & le voila tout prest de se reunir. Il y a plus: car tout homme (diét les canons) qui tiét une heresie, n'est pas pourtât heretique, heretique presuppose une ambition de nouueauté, une opiniastrété contre la raison ensei-

gnée & demonstree. Or peut iuger vn chacun si le Roy de Nauarre est poussé d'ambition en cest affaire. Car disoit le iurifconsulte, cui bono? Quel profit luy en peut il reuenir? Telle ambition tōbe en vn docteur en theologie, mais non en vn prince: telle opiniastrété, tōbe en vn sophiste, mais non en la simplicité d'vn qui est enscigné par autry. S'il estoit meū d'ambitiō, estre ambitieux de la bōne grace du Roy, de la faueur de tous les Catholiques de ce Royaume, des vœuz & suffrages des plus grāds Princes de la Chrestienté en changeant tout soudain de religiō luy seroit plus profitable, & si l'ambitiō fait l'heretique, certes les auteurs de ceste cōspiratiō le sont bien plus que luy. Mais il est meū de conscience, la consciēce luy fait passer par dessus les cōsideratiōs qui les emportent & s'assūre qu'il n'a point a faire à vn peuple, qui desire vn Prince perfide & desloyal, à Dieu & à sa conscience, ains qui se contente de l'auoir paisible capable de raison prest à mieux apprēdre & à mieux faire quand on le voudra mieux enseigner la loy de cest estat ne priue point vn fils à cause de la religiō, d'vne succession directe n'y collaterale, pourquoy vn Prince la loy reçoit en administration de tous estats. Indifferemmēt les vns & les autres pourquoy moīs de l'estat: la loy permet à vn chacun l'exercice de sa religion, & n'en exclut personne, pourquoy le Prince seul fera il excluz de ce priuilege, le Prince qui le donne: pourquoy seul esclau en sa conscience, au plus precieux qu'il ait, celui qui affranchit les autres? Je dis la loy de cest estat. Car cest la loy par laquelle seule nous viuons & pouuons viure en paix, c'est à dire remettre cest estat, en son premier estat, & le retirer de la misere, Loy deliberee aux estats d'Orleans, estats

nō forcez, nō briguez, nō liguez par les menees & pratiques de ceux qui auourd'huy nous troublēt. Je di pl^{is} estats cōnoquez par eux au plus fort de leur credit, & mesme à leur instāce q̄ iamais depuis nous n'auōs voulu enfreindre, que nous ne soiōs entrez en guerre ciuile & quād ie di guerre ciuile, ie pēse cōprēdre sous ce mot, toutes sortes de calamitez & de cōfusions. Loy uōc iuste: car elle est tresnecessaire. Loy non reuocable en la condition de l'estat present, car sa reuocation nous remet en ruine. Loy iugee, loy iuree par tous les Princes, gouuerneurs, lieutenans generaux, Conseillers d'État, Cours de Parlement, sieges Presidiaux, villes & cōmunautēz de ce Royaume, par ceux mesmes qui auourd'huy temerairement en veulēt proteċter, & toutefois qui remet la decision du fait de la religion à vn Cōcile libre, attēdant lequel nul ne peut estre dit heretique en cest estat, & auquel aussi quicōque se soabmet ne peut estre à bon droit tenu pour pertinax ne schismatique. Quelques Empereurs & Constantin mesmes sur sa fin, quelques Rois d'Espagne aussi: par longues annees, ont eu des opinions erronees, erronees aux points plus importants. Et graces à Dieu le Roy de Nauarre n'en est pas là, lit on toutefois que iamais on ait pensē à les deposer? que iamais on ait proposē de les exclure? Quelques Papes mesmes, les docteurs des autres, ausquels le nom d'heretique & d'heresiarche eust peu à bō droit appartenir, ont mal creu de Christ, ont mal enseignē de sa diuinitē, le fonds du salut le seul fondement de la religion Chrestienne. La Chrestietē toute entiere y auoit interest, la source publique, ou chacun puisoit, s'en alloit gasteē, s'en alloit empoisonnee. Voyons qu'on a faict, on a eu patience d'assembler

Vn Concile solemnel, on les a ouys, on les a instruits, on les a receuz à amandement & à resipiscence, iamais n'ont esté prononcez heretiques, qu'en vn plain Concile, iamais on n'a attenté sur leur dignité par presumption, iamais par preuention, iamais par force, on y a tous-jours obserué toutes formalitez, on a tous-jours attendu la condamnation, mesmes apres icelle prononcée, on leur a donné temps pour y penser, on leur a donné respit pour se conuertir à mieux.

Mais il y a danger disent-ils, si le Roy de Nauarre vient à la couronne qu'il ne renuerse la Religion Catholique en ce Royaume. Je respons qu'il y a bon terme, & ce grand soin de si loing hors de saison monstre vne passion fort violente, & qui n'est poussée de religio aucune. Je respons que graces à Dieu, nostre Roy est en la fleur de son aage, fils n'y entendent quelque finesse, qui nous soit cachée, & Dieu l'en garde, ie respons qu'il n'est hors d'espoir d'auoir des enfans, & que luy & la Royne sa femme selon leur aage en peuuent auoir vne douzaine sans miracle: ie respons qu'à ce mal pretendu ils apportent vn foible remede, vn Cardinal qui a deux fois autant d'aage que le Roy, vn Cardinal qui n'est point marié, en danger de mourir premier que l'estre, asséuré de n'auoir point d'enfans quand il le fera.

Et quant à ce qu'ils alleguent du changement de Religion qui seroit à craindre, le Roy de Nauarre leur dira qu'en sa Religion il a esté tous-jours instruit, à ne forcer point les consciences. Qu'en l'ardeur mesmes des guerres Ciuiles, lors que tout exercice estoit defendu par toute la France à ceux de la Religion, il a tous-jours laissé la Religion Catholique en son entier, en toutes les villes esquelles il auoit puissance, & de ce ne veut

pour tesmoins que le Clergé & les Prestres & Moy-
 nes d' Agen, ou il faisoit sa residence. Qu'en paix & en
 guerre il a tous-jours esté seruy indifferemment, tant
 aupres de sa personne qu'en tous les Estats & Offices,
 qui sont en sa disposition des vns & des autres: mesmes
 en sa chambre, en son conseil & en ses gardes, & n'en a
 iamais reculé aucun pour le faict de conscience, & ceux
 qui ont tant soit peu approché de sa maison le sçauent
 bien. Qu'en ce que Dieu luy a laissé de son Royaume
 de Nauarre qui est beaucoup plus grand que son país
 de Bearn, il à laissé la Religio Catholique & Romaine
 en son entier, sans y auoir rien alteré ny innoué selon
 qu'à son auenement il l'auoit trouuée, ce que malicieu-
 sement on cele, se contétant de le calomnier sur le faict
 de Bearn. Et quant à sondict país de Bearn : que l'ayant
 trouué reduict par la feuë Royne sa mere, par vne con-
 uocation generale des Estats à la Religion de laquelle
 il faict professiõ, il l'a à la verité laissé en ce mesme estat
 auquel il le trouuoit, ayant esté tant occupé és trauaux
 qu'on luy a brassé, qu'il ne luy estoit pas à propos d'y
 rien changer, ce pédant qu'on sçait qu'il en a leué les ri-
 gueurs, & y a moderé les ordonnances, & faict payer
 aux Ecclesiastiques leurs pënsions, & mesmes quelques-
 fois de ses propres deniers. Ce que les Euesques & Ec-
 clesiastiques qui ont du bien esdicts país ne peuuent
 nier. Au reste tous-jours offert d'ouuir les Estats à son
 peuple, afin qu'ils y peussent franchement ouuir la
 bouche, & luy declarer en iceux ce qu'ils auroiét à reque-
 rir pour la paix de leurs ames & cõsciées. Que si on tire
 vne mauuaise consequence de ce qu'il n'a remis la Reli-
 gion Catholique & Romaine en Bearn, qu'on en doit
 donc tirer vne bonne de ce qu'il ne l'a ostée en la basse

Nauarre, où il a pareille puissance, mais que toutes personnes non passionnées la deuroient tirer bõne de l'vn & de l'autre en ce qu'en l'vn & en l'autre il n'a rien remué ny innoué, (sauf qu'il a moderé la rigueur des ordonnances de Bearn, attendant mieux.) A sçauoir qu'il n'est pas Prince qui se plaise en nouueautez, qui procede legerement aux changemés par vne violente passion contre vne religion ou contre l'autre, ains qui laisse volõtiers les choses au poinct ou il les trouue sil n'y voit vne vtilité bien euidente. Et de faict qui estimera le Roy de Nauarre, si despourueu de iugement, si ennemy de sa grandeur & de son bien, si Dieu & nature l'appelloient à vn estat, de le vouloir perdre ou mettre au hazard par vne violence sans raison, & qui plus, par vne violence sans effect, & qui ne pourroit luy attirer que sa ruine? Et qui croira que celuy qui n'aura voulu forcer tant soit peu vn país de Basse Nauarre qu'il pouuoit sans contradiction, vueille forcer vn Royaume de France, qu'il ne peut & sans le perdre, & sans se perdre soy-mesme? Ces doutes peuuent tomber au cœur des Idiots: mais non des sages. Ceux mesmes qui les protestēt ne les font pas, encor' qu'ils taschent à desseing de les faire croire. Et puis quand les choses seroient reuictes à ce poinct, on peut prendre assurances des doutes qu'on a, le peuple les requiert, & le Prince les baille. Et de ce Prince, graces à Dieu, on ne peut remarquer iusques icy, ny vengeance, ny perfidie, mais de s'armer dès ceste heure, pour vne chose naturellement si loingtaine, de parer vn coup qui vient de si loing, qui peut estre de vingt ou trente ans ne nous peut arriuer, & souz ce pretexte, mettre cest estat en feu, l'Espaignol dedans pour nous ruyner, entāt qu'en eux il seroit, & plus,

& plustost que le mal qu'ils alleguent ne pourroit pas faire, c'est nous ordonner la Cigue, pour nous empêcher vn accez de fièvre, c'est vne mort assurée pour remede d'une maladie incertaine, c'est donc vn dol manifeste, car l'ignorance en seroit trop grossiere. C'est vn empoisonnement au patient, c'est vne trahison à cest estat, c'est vne coniuration contre le Roy: & quand il aura nommé ce successeur, successeur qui ne pourra esperer de le suruiure, successeur toutesfois nommé à ceste intention emply de cest espoir, qu'elle assurance pourra prendre le Roy d'eux, qu'ils ne s'en vueillent defaire?

Laiſſons le Roy de Nauarre, il ſçaura quand il en fera beſoing plaider ſa cauſe, & Dieu vueille que iamais il n'en ſoit beſoing. Voyons ſi le reſte de leur proteſtation à plus de verité ou de couleur, ils ſe plaignent de quelques ieunes gens qu'ils dient poſſeder le Roy, tirer de grâds biens de luy, & en reculer les Princes, les vieux ſeruiteurs & les principaux de la Nobleſſe, ſans rien denommer, chacun voit aſſez qu'ils deſignent, ce ſont les Ducz de Joyeuſe & d'Espéron. Si le Roy les aime ce n'eſt choſe ſi eſtrange. Perſonnes priuees, en leurs amitez, deſirēt bien eſtre libres: combien plus les Princes? Et en nos hiſtoires vit on iamais Prince qui n'aimaſt quelque vn? S'il leur faiçt du bien, c'eſt la volonté qui produiçt ſon eſſect: aimer proprement c'eſt vouloir du bien, c'eſt faire du bien, car le vray vouloir ſ'eſtend auſſi toſt à la proportion de ſa puiſſance. Mais ſils diſent trop, & que leur cenſure ait lieu icy. Bons reformateurs: & leur exemple vaudroit, ſils vouloient commencer par eux-meſmes: Qu'ils nous diſent donc, d'où il ſ'eſt peu faire que leur feu grand pere quād

il vint premierement en France, n'eust pour tout que quinze mil liures de rante, & que maintenant ils en ayent en leur maison plus d'un million. Si ce n'est par la liberalité & bonté de noz Rois: de noz Rois, ie dis qui leur ont donné de belles charges, de grands Eueschez, de belles Abbayes, des plus riches heritieres de ce Royaume: de noz Rois, en la bource desquels, tant qu'elle leur a esté ouuerte: ils ont si bien sceu fouiller, qu'ils se trouueront auoir tiré six ou sept millions d'or, dont sont procedees leurs plus belles acquisitions, à l'auènement du Roy Charles à la couronne, auoit esté conclusés Estats d'Orléans, qu'ils seroient appellez à reddition de compte, & recherchez des dons immenses qu'ils auoient receuz des predecesseurs Rois, & tout fraische-ment du Roy François deuxiesme, duquel ils auoient emparé la personne & la bource tout ensemble. Mais au lieu de penser à rendre compte, ces bôs reformateurs aduiserent au moyen de n'en point rendre, commençās sans commandement du Roy & contre les Estats de ce Royaume, à tuer ceux de la religion contraire en la ville de Vassy: c'est à dire à allumer le feu par vn des coings, qui puis embrasa pour vn long temps toute la France. Le pere pour ne rendre conte nous mit en combustion, & aujourd'huy le fils nous met à la guerre pour faire conter les autres. Voyons donc comment respondent icy, fils le font à bon escient, fils ne se iouent point, s'ils n'abusent point le peuple. (Tous sçauent ils pas que saint Luc & Do leurs principaux partizans, & quelques autres, sont riches des dons du Roy? ont trempé en ses finances? ont tenu en somme cy deuant mesme lieu que ceux qu'ils taxent? & qu'ils font semblant d'amener icy à conte? content les premiers, qui premiers ont fait re-

cepte. Eux doncques les premiers: certes difons mieux, ces gens font marris que les faueurs de la Cour ne pleuent tousiours sur eux, & si elles degouttent sur autruy creuent d'enuie. Ces gens vont briguer mal contens comme eux de toutes parts, & ces mal-contens qui veur regarder leur condition sans passion, sont si à leur aise, ont tant receu de bien-faits, que l'aïse seul les deuoye, & sans les bien faits, ils n'auoient puissance de mal faire. Le vray mal-content, celuy qu'il faut plaindre, & celuy duquel la condition est miserable, certes c'est le Roy, d'auoir fait du bien à race si ingrate, donné du pouuoir, donné du moyen, donné de l'autorité, pour estre employé aussi tost contre luy.

Ils plaignent le peuple, & que donc ne le laissent ils viure en repos: & pourquoy trauerfent ils le Roy en la volonté qu'il a de luy bien faire, d'oc desia il faisoit voir de bons effects? on sçait qu'il l'auoit soulagé pour cest annee de sept cens mil liures, & cassé en vn iour quatre vingts ou cent Edicts, que l'on luy auoit remonstré estre à la charge de son peuple, & se preparoit à vne reformation generale de son Royaume, c'estoit commencer en vne autre annee, il eust fait d'auantage: & en telles choses la volonté y estant, le progres va loin en peu de temps. Auuiourd'huy qui doute que nouvelle guerre ne luy cree nouueaux despens? nouueaux maux au peuple? Et puis quel mesnage pensons nous que facent ces bons mesnagers, qui desia comencent à leuer de grands deniers sur les villes qu'ils detiennent? mesmes ont taxé la ville de Bourg en Bourdelois à dix mil escuz, qu'ils n'eussent pas payé en dix ans au Roy? prests d'enuoyer les Maire & Juratz de la ville prisonniers en Broüage? Pensons puis apres aux armées tant Françoises qu'e

strangeres, qu'il faudroit nourrir & soudoyer de part & d'autre, Pensons aux deniers du Roy, que ia ils vsurpent & saisissent, qu'il faudra remplacer d'ailleurs pour s'opposer à leurs rebellions, aux estappes, aux munitions, aux contributions, aux passages des gens de guerre. Toute guerre est vn monstre deuorant, combien plus la domestique? Toute guerre est vne vraye confusion, combien plus celle qui est conduicte par gens de confusion comme ceux cy? certes ie diray & l'ay dit. Trois iours de sedition ciuile cousteront au pauure peuple vne annee de taille & plus, trois ans de guerre bien iuste, quand ils auroient bonne intention, ce qu'ils n'ont pas, ne vaudront iamais au pauure peuple, vn iour de paix.

Mais le Roy a tort, c'est ce qu'ils nous disent, car il ne fait pas assez de cas de sa noblesse. Voyons qui les suit, & voyons qui proteste avec eux. Des Princes du sang, ie n'en voy vn seul en ce party, si ce n'est ce bon Prince qu'ils abusent, qu'ils ont enchanté, duquel ils se font donner le bien pour l'oster à ses nepueux. Si sont ils les chefs & les protecteurs de la noblesse, des vieux officiers, des vieux Cheualiers, des vieux Capitaines de la France, à peine vn tout seul, ie ne voy par tout que des Lorrains, quelques malcontents: Que n'eussent ils plus qu'ils ne meritent: quelques gens perduz, gens de ton party, gens disoit Cesar, à qui la combustion & à qui la guerre ciuile duit, telz que ceux que Catilina eut à sa suite. Pensez que Lorrains se souciét beaucoup si nostre noblesse est bien: Pensez que Lorrains qui tant qu'ils ont peu ont de tout temps rualé la dignité de noz Princes, prennét bien à cœur que chacun tienne son rang. Qu'il n'alle-guent point qu'on leur aye prins leurs estatz, ils les ont venduz, ils en sont payez, & cherement. N'alle-

guent aussi qu'on en ait contraint aucuns de s'en deffaire: il leur tient au cœur. C'estoient gens pour la pluspart à leur deuotion, & de leur ligue, & leur faict grand mal qu'õ les en fait sortir. Aucungens d'hõneur ont accommodé le Roy de leurs estatz: mais s'e plaignent ils? mais les verra on rengez souz leur banniere? Ains plustost contr'eux, ils sçauent tresbien que leurs estatz sont charges, charges que noz Rois par les anciennes loix, auant tous noz remuemens souloiet remuer de temps en temps: charges, non estatz & non offices: Car les Princes les en rappelloient à leur plaisir, sans formalité, sans remboursements, sans alleguer cause ne pretexte, non pour les priuer indignement, mais pour en tirer quelque meilleur seruice, nõ pour les frustrer, ains pour les recompenser & honorer ailleurs, & aussi ne le prenoient ils à mal, car ils n'abusoient de leurs gouuernemens pour se rendre necessaires à leurs Princes ou pour se faire achepter, ou pour se les rendre hereditaires. C'est vn mal nouveau, introduict par les auteurs de ces nouuelletez qui pour attirer quelques gouuerneurs à eux, plus liberaux que les maistres leur promettent hardimēt que leurs gouuernemēs leur deuiendrõt patrimoines, car par ce qu'ils ne tendent qu'à la dissipatiõ de cest estat, & cognoissent bien qu'ils ne peuuent pas le retenir tout en vn, ils font bon marché du reste & ne feignent pas à l'exposer en proye.

Et pour faire paroistre qu'eux mesmes ont monstré le chemin, & faict la planche à ces abuz pretenduz par eux aux changemens des principales charges & gouuernemens de ce Royaume. Qu'on se resouuienne que lors que tous ceux de leur maison estoient en credit, ils ont osté a ce grand Connestable, qui auoit tant merité de la
France,

France, l'estat de grand Maistre, & celuy de grand Châbellan, à la maison de Longueville, qui leur estoit hereditaire, pour les seruices qu'ils auoient faitz contre les Anglois. Et de fraische memoire, ont tant fait que le gouvernement de Bretagne est tombé en leur maison, apres l'auoir soustrait moitié par ruses, moitié par contrainte, a ce feu bon Prince Monsieur de Montpensier, qui en auoit la prouision pour monsieur le Prince de Dombes son fils qui en iouissoit, & puis ils se plaignent pour quelques particuliers qu'ils disent auoir trafiqué leurs charges. Et ne se veulét souuenir de tant de grans personages lesquels ils ont despouillez de leurs estats & dignitez.

Le Clergé, la cause duquel ils veulent sembler entreprendre: ie demande quelle reformation ils y apporteront meilleure que nostre Roy? Le Roy fil est question de sa personne, monstre à toute sa Cour le chemin de l'auoir en reuerence. Il a pour conseil les plus apparens, & les plus notables d'iceluy. Aux charges & dignitez de l'Eglise, par les bonnes ordonnances qu'il a faittes conformes aux anciés Canons, & desquelles nul de ses predecesseurs ne fut iamais si seuerer obseruateur que luy, Il choisit les plus excellens, soit en vie, soit en doctrine, qu'il cognoisse en son Royaume, en forclost toutes personnes indignés & incapables, sans acception & exception de qualitez: n'y admet que ceux qui naturellement peuuent exercer les charges contrainct les Euesques de resider en leurs dioces, plus seueremēt & plus exactement que ne fait le Pape mesmes, monstre au reste à tous le chemin de zele & de deuotion. Que se peut il adiouster à ce bel ordre, sinon le loisir d'en recueillir le fruit: de le voir profiter? Mais ce n'est pas la predi-

cation de la parole de Dieu qu'ils demandent, ils ne se soucient pas que ce Royaume soit peuplé de bons predicateurs, que le peuple soit instruit en son salut, que la brebis desuoyée y soit ramenée. Ils veulent des Iesuytes qui inspirent le venin de leur cōspiration souz ombre de saincteté en ce Royaume, qui souz couleur de confession, quelle horrible hypocrisie! abusent de la deuotion de ceux qui les croient & les obligent par serment à ceste Ligue & à leur party, qui exhortent leurs subiects à tuer & assassiner leurs Princes, leur promettent plein pardon de leurs pechez, leur font croire que par actes execrables ils meritēt paradis: vrayes colonies d'Espagnols, ains disons plustost, Vray-leuain d'Espagne en ce Royaume, qui depuis quelques années a enaigry nostre paste, à hespagnolisé souz vn sourcil pharisaic les villes de nostre France: desquels les conuents sont plus dangereux que citadelles, desquels les Synodes ne sont rien que cōspiratiōs. Tels sont ils cogneuz. Tels nous sont les fruiets de l'assemblée generale qu'ils tenoient à Paris, nagueres en Septembre, & y presidoit certain Iesuite du Pont à Mousson directeur de ces cōseils: Autres y en a qui blasment le Roy en plaine chaire, suscitent le peuple, s'arment de fureur contre les Magistrats, preschent les loüanges, recommandent les vertus de ces pretenduz reiettons de Charlemaigne. C'est ce zelle ardent, c'est ceste Religion qui les anime: & voulez vous voir? Quand ils sont en Allemaigne, ils sont Lutheriens. Sont-ils mutinez? Qui leur eust presté la main ils remettoient sus les Caluinistes. Soigneux du Clergé, soigneux du seruice, soigneux de tenir leurs residences, qui possèdent nombre d'Eueschez, nombre d'Abbayes contre les canons, contre le Concille qu'ils

nous vont preschant en France, en vendent les bois, en dissipent le domaine, laissent les Eglises, laissent les maisons aller par terre, vendent les reliques, retirent à eux tout ce qu'il y a de precieux, d'aumosnes fort peu, les pauvres tout nuds: & les Prestres mesmes y meurent de faim. Vrais heretiers, non de Charlemaigne: certes, mais de Charles de Lorraine qui sceut fort deuotement vendre à son proffit la grād croix & les plus riches ioyaux de son Euesché de Mets, fit védre au Clergé de ce Royaume partie de son temporel & augmenter les decimes, & n'eust point de honte pour le bon seruice qu'il pretendoit auoir fait en cest endroit de s'en faire donner vne partie en recompense.

Reste la Iustice, ces iustes Censeurs là nous veulent restablir en son integrité: Qui iamais à veu qu'vne guerre domestique ait esté propre à reformer la iustice? Qui ne voit assez qu'vn seul an de guerre lache plus les nerfs des loix & leur oste plus d'authorité que dix ans de paix ne luy en peuuent rendre? Lasche plus la bride au mal que dix ans de paix ne la luy peuuent retenir? Ces gens pour exemple quand ils auront fait leurs rages, viendront à s'en repentir, il leur faudra des pardons, des remissions, des abolitions, il faudra que les loix dorment, il faudra que les Iuges conniuent, qui recommençoient à reprendre leur authorité. Mal tousiours sur mal, ja les deffiances des partis par la prudence du Roy, commençoient à se leuer, ceux de la Religion cōtraire recognoissoient peu à peu que par la voye ordinaire ils pouuoient auoir iustice, sans qu'il leur fist grand besoin d'vn cōflict de iurisdiction. Ces perturbateurs protecteurs des Parlements qui leur promettēt icy plenitude de puissance, donnent nouueaux argumens de deffiance, ostent le

moyen de reünir à ce poinct les volontez. Qui plus? On fest plainct souuent de la venalité des offices de iudicature, introduite premierement pour ayder à supporter les guerres estrangeres, & depuis continuee pour subuenir aux ciuiles. Or sçait vn chacun, que le Roy n'a eu tât soit peu de relasche, qu'il n'ait aussi tost aboly ceste venalité, & tous les moyens par lesquels indirectemēt on la pouuoit courir. Et si ceste saincte ordonnāce est par luy sainctemēt obseruee, tous les parlemens & sieges de Frāce en sōt tesmoins, qui se peuuēt souuenir que le Roy n'a voulu admettre quelques resignatiōs tresfauorables uorable, desquelles la cōsequēce eust peu faire fraude à l'ordōnāce à l'aduenir, quel soin il a eu depourueoir aux dignitez principales en ses parlemens, quand elles sont venuës à vacquer, on le void en ceux qui auourd'huy les tiennēt nōmez de son propre mouuemēt, & choisis par son bon iugement, gens d'integrité, de capacité, & de doctrine, desquels la vie est vne censure, la doctrine vne lumiere entre les hommes. Quel soin il auoit mesmes sur le point que ce trouble est aduenu, d'abreger les procez entre son peuple, & d'oster les mangeries qui se consument? sçauēt ceux aussi qu'il a appelez en conference, par lesquels il en a voulu estre informé par les menuz. Ces gens cy le sçauent, ces gēs n'en peuuēt douter, y ayans partie d'eux esté mesmes appelez. Tout nostre mal est, qu'ils voudroient gouverner ou gourmander la Cour pour y mettre comme ils faisoient autrefois gens à leur poste, & s'ils eussent peu continuer de mesme, les estatz fussent venaux, la iustice en son entier, & ne parleroient ny de reformation à present ny d'abuz.

Par là donc voyons nous que ces protections & protestations, ne sont que vains pretextes. La vraye cause,

c'est l'ambition de gouverner & de regner, c'est la dissipation de nostre estat, pour en emporter vne piece & y introduire l'estranger. C'est vne continuatiō du dessein qu'ils ont eu de long temps, & duquel les memoires furent descouverts dès l'an 76. lequel se manifeste aujour-d'huy plus clairement, selon qu'il s'approche plus de l'execution, & nous du danger. Ce pendant ils prient le Roy de ne point mal penser d'eux. Que c'est pour son bien, qu'ils n'ont tous iuré que son seruice. Ainsi fist Pepin, (& ceux cy se disent de la race) employant cōtre son Roy Chilperic la force & l'autorité qu'il luy auoit donnée, & la saincteté du Pape Zacharie: Le Roy est prudent le François loyal, le ieu descouuert, & auons appris que la saincteté condamne les pariures; que la saincteté ne conseille iamais de fausser la foy, forcer sa patrie, & se rebeller contre son Roy. A ce beau dessein ils n'ont point de hôte de cōuier la Royne mere du Roy, de les assister de son autorité, la Royne qu'ils confessent auoir conserué cest estat par tant de fois, à la ruine & dissipation totale du Royaume, à la coniuration qu'ils font contre le Roy son fils, conuient les Princes du sang à transporter leur honneur en autre nation & en autre race. Tous les Pairs de France à trahir l'estat duquel leur estat les fait comme curateurs, souz l'autorité de nostre Roy. Les cours souueraines à soucrire à leurs desseings, que Dieu à assis en iugement pour la condemnation de telz perturbateurs: Les Catons, ie dis à ceste Catilinaires, & n'ont point de honte d'inuocquer Dieu la dessus, de prendre son nom en vain, de l'appeller à tesmoin de leur sincerité & droicteure en ceste cause. Dieu ialoux de son saint nom, scrutateur des cœurs des hommes, qui ne peut tenir pour innocent qui employe son nom à vani-

ré, combien plus à dessein si execrables? desseins execra-
 bles, qui souz nom de pieté, de iustice, & d'ordre, con-
 fondent tout vn estat, le remplissent de vengeances, de
 meurtres, de brigandages, font vn million de veufues, &
 d'orphelins, reduits à la faim, & au bissac, tout pour con-
 tenter la seule ambition: Dieu void tout cela, Dieu pe-
 netre iusqu'au fonds. Dieu duquel ils vont se moquant
 en l'inuoquant, & duquel ils sentiront le iuste courroux
 & la malediction & la vengeance: Dieu garde des Rois,
 Dieu tuteur des loix, conseruateur des polices, prote-
 cteur du pauvre peuple, Qui les destruira, qui les con-
 fondra, qui les foudroiera, destruisans son peuple, con-
 fondans tout ordre, renuersans les loix, coniuans con-
 tre leur Roy, & son estat, abusans sur tout de son nom
 sacré, du zele de Christ, & de l'Eglise, pour souz ce beau
 voile attenter à leur superieur, voler sa couronne, expo-
 ser en proye tous ses subiects.

THE
MIDDLE
AGE



THE
NEWBERRY
LIBRARY